

KABAKTIANG MINGGU PARTAMA

SIAP-SIAP

- Jamaat balajar lagu-lagu baru
- Sombayang di konsistori
- Majalis baca barita jamaat

A. DATANG PAR TUHAN

Kampinjang¹ babunyi tiga kali, **jamaat badiri** par jadi tanda jamaat tarima TUHAN la manyanyi lagu maso. Waktu jamaat manyanyi, orang-orang yang pung tugas dalang ibada (*majalis yang pung tugas, pandita, majalis jamaat yang laeng, orang yang baca Alkitab, deng kolektan*) maso ka tanpa ibada.

01. TUHAN ADA DENG KATONG DENG BILANG TABEA²

Pdt³ : Jamaat samua, cuma Allah sa yang bisa tolong katong. Antua tu yang biking dunya deng akang pung isi samua deng yang salalu jaga deng kalesang samua-samua yang Antua su biking.

J : (*Manyanyi lagu KJ No 476bc 1 = E*)⁴

1 . 7 . 1 . |

A - min

Pdt : Beta minta biar Tuhan Yesus Kristus kasi berkat basar deng dame par jamaat samua.

J : Deng par *bapa/ibu*⁵ lai.

02. NATS ALKITAB YANG JADI DASAR DALANG KABAKTIANG NI

03. JAMAAT MANYANYI

(Langsung dudu)

04. MANGAKU DOSA

Pnt : Jamaat, mari katong tundu di muka Allah la mangaku katong pung dosa par Antua.

--- *Jamaat tado sadiki tempo la satu-satu mangaku dia pung dosa par Allah.*

Waktu itu, ada orang yang barmaeng lagu satu deng alat musik.---

Pnt+J : Sio Allah, katong mangaku kalo katong ni orang-orang bardosa. Banya kali katong seng biking apa yang Allah mau. Katong jaga rasa diri kuat sampe katong seng taru harap par Allah lai.

S : (*Manyanyi lagu Bapa Ampong Beta Jua*)⁶

||: 3 5 6 1 6 5 3 3 . . :||

1. Ba - pa am-pong be-ta ju - a

2. Kris-tus am-pong be-ta ju - a

Pnt+J : Sio Allah e... Katong mangaku kalo katong ni seng paduli deng tana, aer, deng udara di negri yang Allah kasi par katong ni. Katong rubu pohong-pohong yang ada di utang takaruang. Katong kasi ancor karang-karang di lautang deng biking kotor aer deng udara. Akang pung laste, dunya ni jadi panas paskali, tana goyang, anging ribut, banjir, deng tana longsor jadi di mana-mana.

J : (*Manyanyi lagu Bapa Ampong Beta Jua*)⁷

¹ *Kampinjang* ni lonceng gareja.

² *Tabea* ni pung arti sama deng "kalwedo" ka "kidabela". Bisa jua bilang "Pagi bae" ka "Malang bae".


³ Bisa pandita, penatua, ka sapa sa yang pimping ibada.

⁴ Bisa pake lagu laeng yang bicara soal hal yang sama.

⁵ Bisa pake istila laeng yang orang biasa pake di jamaat-jamaat ka daera-daera macang nyong pandita ka nona pandita, mama pandita ka papa pandita, bapa penatua ka om penatua, ...

⁶ Bisa pake lagu "*Tuhan Kasihani*" yang laeng lai.

⁷ Bisa pake lagu laeng yang bicara soal hal yang sama.



Pnt+J : Sio Allah e... Katong mangaku kalo katong cuma pikir katong pung diri sandiri, katong pung suku, katong pung kalompok deng agama, sampe katong lupa orang laeng yang beda dari katong. Katong seng talalu pastiu deng Tuhan, orang laeng, deng dunya yang Tuhan biking ni.

J : *(Manyanyi lagu Bapa Ampong Beta Jua)*⁸

Pnt+J : Sio Tuhan Allah e... Tolong kasi unju Bapa pung sayang par katong jua. Hapus katong pung dosa-dosa deng basu katong barsi dari katong pung sala samua. Tagal katong tau kalo Bapa paleng sayang katong deng pung hati paleng bae par katong.

J : *(Manyanyi lagu Bapa Ampong Beta Jua)*

05. ALLAH KASI AMPONG KATONG PUNG DOSA

Pnt : Par basudara samua yang batul-batul mangaku dosa par Allah deng yang batul-batul manyasal basudara dong pung dosa-dosa, Allah su kasi ampong basudara dong. Ini su tatulis dalang kitab *Yesus pung Utusang pung Carita*⁹ pasal 13:38-39 yang bilang kata, "Basudara e! Kamong musti tau kalo tagal Yesus su mati di kayo salib, kamong pung dosa-dosa bisa dapa kasi ampong. Ini ni pasáng yang katong ada bilang par kamong. Jadi sapa sa yang percaya Yesus, dia pung dosa samua dapa kasi ampong la Allah bilang kalo dia tu batul di muka Antua."¹⁰

J : *(Manyanyi lagu _____)*

06. HIDOP IKO TUHAN PUNG MAU

(Langsung badiri)

Pnt : Basudara jamaat e! Mari dengar la biking Tuhan pung mau dalang basudara dong pung hidop sabang hari, macang deng apa yang su tatulis dalang kitab *Roma* 13:8-10 yang bilang, "Jang bautang par sapa sa. Kalo kamong ada pung utang, kamong musti kasi lunas akang. Mar yang paleng panting tu, kamong musti baku sayang satu deng laeng. Anggap sa itu tu kamong pung utang par orang laeng yang kamong musti bayar akang tarus-tarus. Barang, sapa yang sayang orang laeng, dia tu su biking atorang-atorang samua dalang Kitab Torat. Tagal, Kitab Torat ada bilang bagini, 'Jang maeng serong, jang bunu orang, jang pancuri, deng jang baringing.' Atorang-atorang tu deng atorang-atorang yang laeng lai, akang pung dasar ada dalang atorang satu ni yang bilang, 'Sayang orang laeng macang deng ale sayang ale pung diri sandiri.' Sapa yang sayang orang laeng, dia pasti seng biking apapa yang jahat par dong. Jadi sapa yang sayang orang laeng, dia tu su biking atorang-atorang samua dalang Kitab Torat."¹¹

J : *(Manyanyi lagu _____)*

(Langsung dudu)

B. BACA DENG DENGAR ALLAH PUNG AJARANG

07. SOMBAYANG MINTA TUHAN PUNG ROH TOLONG : (Penatua yang pung tugas)

Sio Tuhan e, katong minta biar Tuhan pung Roh tolong katong par baca Alkitab, biar waktu katong dengar Tuhan pung Ajarang, katong bisa mangarti deng biking akang dalang katong pung hidop sabang hari. Amin.¹²

08. BACA ALKITAB : (Jamaat dua orang, parampuang deng laki-laki)

Abis baca, penatua bilang:

⁸ Bisa pake lagu laeng yang bicara soal hal yang sama.

⁹ Ini ni Kisah Para Rasul.

¹⁰ Ka bisa pake nats laeng yang bicara soal hal yang sama.

¹¹ Ka bisa pake nats laeng yang bicara soal hal yang sama.

¹² Ini cuma conto sa. Bapa ibu dong bisa sombayang deng kata-kata sandiri.

“Basudara e, katong su dengar Allah pung Ajarang tu jadi mari katong biking akang, tagal Allah pung Tulisang sandiri jua ada bilang, ‘...Jang kamong cuma dengar Allah pung Ajarang sa, mar musti biking akang lai dalang hidop. Kalo kamong cuma dengar mar seng biking akang, kamong su parlente kamong pung diri sandiri.’”
(Yakobis 1:22)

- J : (Manyanyi deng hati sanang tagal su dengar Allah pung kata-kata)
- Haleluya, Haleluya, Haleluya (Par Minggu Biasa, Tuhan Yesus Hidop Kombali, Tuhan Yesus Nai ka Sorga, Tuhan pung Roh Turung, deng Kajadiang)
 - Hosiana, Hosiana, Hosiana (Par Minggu Sangsara)
 - Maranata, Maranata, Maranata (Par Minggu Adventus)

09. RIWAYAT

10. DUDU TADO LA INGA-INGA RIWAYAT (Waktu itu, ada orang yang langsung barmaeng lagu satu pake orjen ka suling, ka alat musik laeng barang satu menit)

11. JAMAAT MANYANYI

C. JAMAAT PUNG JAWABANG

12. MANGAKU KATONG PUNG PARCAYA

(Langsung badiri)

Pdt : Basudara jamaat, mari katong mangaku *Katong pung Percaya*, sama-sama deng samua orang yang percaya di sagala waktu deng tampa. Katong bilang:

Beta parcaya par Allah Bapa
yang pung kuasa par samua-samua yang ada.
Antua yang biking langit deng dunya ni.

Beta parcaya par Yesus Kristus,
Allah pung Ana satu areng-areng,
yang jadi katong pung Raja.

Antua ada dalang Maria pung poro tagal Allah pung Roh,
la lahir ka dunya biar kata Maria ni masi parawang.


Antua dapa siksa waktu Pontius Pilatus pegang parenta.
Antua dapa salib, mati, la dapa kubur.
Antua turung ka orang mati pung dunya,
la hidop kombali pas akang pung lusa.

Antua nai ka sorga,
dudu di Allah pung sabala kanang,
la pegang parenta sama-sama deng Antua
yang pung kuasa par samua yang ada.

Antua nanti datang dari sana
par jadi hakim par samua orang
yang masi hidop deng yang su mati.

Beta parcaya par Allah pung Roh.

Beta parcaya kalo Allah su pilih katong
par jadi Yesus pung orang-orang
yang taika jadi satu di antero dunya ni,
deng sama-sama tarima apa yang bae dari Antua.



Beta percaya kalo Antua kasi ampong katong pung dosa-dosa
deng nanti kasi hidop katong pung badang kombali,
la katong hidop tarus-tarus deng Antua.

Amin.

(Langsung dudu)

13. MANYANYI PUJI TUHAN : KOOR/VG/TRIO/SOLO/KA YANG LAENG

14. TANDA JAMAAT MINTA DANGKE

Dkn : Basudara jamaat e! Tuhan su kasi hidop par katong. Jadi katong musti pake hidop ni par puji-puji deng taru hormat par Antua deng cara bantu katong pung sudara-sudara deng kalesang tana, aer, deng udara di katong pung negri ni. Mari katong bawa apa yang Tuhan su kasi par katong tu par puji-puji deng taru hormat par Antua.

(Waktu kolektan¹³ kumpul apa yang jamaat kasi, jamaat manyanyi pake suling ka orjen.)

15. SOMBAYANG PAR JAMAAT PUNG TANDA MINTA DANGKE : (Diaken yang pung tugas)

Dkn : Sio Tuhan Allah yang salalu sayang katong, tarima katong pung tanda minta dangke ni jua la tolong katong par pake akang bae-bae par jadi berkat par katong pung basudara deng par kalesang katong pung tana, lautang, deng udara di negri ni biar lewat katong orang-orang bisa puji-puji Tuhan. Amin.¹⁴

16. MANYANYI PUJI TUHAN : KOOR/VG/TRIO/SOLO

17. SOMBAYANG PAR GAREJA DENG DUNYA

(Laste, samua orang sombayang sama deng apa yang Yesus ajar:)

Sio Bapa di Sorga. Katong minta biar samua orang taru hormat par Bapa.

Katong minta biar Bapa pegang parenta jadi Raja par samua orang, deng biar Bapa pung mau jadi di dunya ni, sama deng yang jadi di sorga.

Katong minta biar Bapa kasi makanang yang katong parlu hari ini.

Sio Bapa e! Tolong kasi ampong katong pung dosa-dosa jua, sama deng katong jua kasi ampong orang-orang yang biking sala par katong.

La jang kasi tinggal katong dapa coba par biking dosa.
Mar, kasi selamat katong jua dari Setang pung Raja pung kuasa.

Tagal Bapa tu Raja,
deng yang pung kuasa par samua-samua,
deng yang pantas par dapa puji tarus-tarus.
Amin.

D. ALLAH UTUS JAMAAT DENG JANJI PAR ADA SAMA-SAMA DENG KATONG

18. JAMAAT MANYANYI


(Langsung badiri)

19. ALLAH UTUS

Pdt : Basudara jamaat e! Ibada hari ini ni musti jadi dasar par katong pung hidop

¹³ (a) Abis Diaken bicara baru kolektan ambe tanggu; (b) Abis kolektan kumpul jamaat pung tanda minta dangke, kolektan bajalang sampe ka muka la badiri tangada mimbar la taru tanggu-tanggu tu di meja.

¹⁴ Ini cuma conto sa. Bapa ibu dong bisa sombayang deng kata-kata sandiri.



sabang hari. Yesus bilang kata, "...Beta su kasi tugas kamong par pi biking apa yang bae, la apa yang kamong biking tu bisa kasi kaluar hasil yang batahang tarus-tarus, macang deng jaga-jaga pohong anggor yang kasi kaluar bua yang banya deng bagus-bagus..." (Yohanis 15:16)

20. ALLAH JANJI PAR ADA SAMA-SAMA DENG KATONG

Pdt : Tagal itu basudara e, mari dengar Allah pung janji:
"TUHAN KASI BERKAT DENG JAGA BASUDARA DONG SAMUA.
TUHAN KASI UNJU ANTUA PUNG HATI BAE DENG BERKAT BASAR PAR
BASUDARA DONG SAMUA.
TUHAN SAYANG DENG KASI DAME PAR BASUDARA DONG SAMUA." AMIN!
(Orang Israel di Padang Gurun¹⁵ 6:24-26)

J : Manyanyi

$\overline{3\ 3} \quad \overline{3\ 2} \quad \overline{13\ 21} \quad 5 \cdot \cdot \parallel$

A-min, a-min, a-----min.

----- **Dudu** tado la minta dangke dari Allah -----

(Jamaat tolong jang kaluar kamuka pandita deng majalis dong. Pandita deng majalis-majalis bajalang kaluar la badiri di muka pintu. Tarus, pandita deng majalis-majalis pegang tangang deng jamaat, bagitu lai jamaat deng jamaat. Waktu samua ada pegang tangang, kantoria ka majalis yang pung tugas pimping lagu.)

¹⁵ Ini ni kitab Bilangan.